

OROZKOKO UDALAREN KIROL-INSTALAZIOETAKO ZERBITZUEN ARAUDIA

I. TITULUA

XEDAPEN OROKORRAK

1. artikulua.—Araudiaren xedea

Araudi honen xedea Orozkoko Udalaren kirol-instalazioen jardunbidea, erabilera eta gozamina arautzea da. Instalazio horiek jolaserako jarduerak eta jarduera fisikoak eta, oro har, edozein pertsonak egin nahi duen kirol jarduera babestu, sustatu eta garatzeko sortu dira.

2. artikulua.—Udal kirol-instalazioak

Udal kirol-instalazioak dira Udalak kirolak, jarduera ludikoak eta oro har kultura fisikoak praktikatzeko eta garatzeko dituen eraikin, zelai, barruti eta bulego guztiak. Kirol-instalaziotzat joko dira, halaber, horretara bideratutako ondasun higigarriak eta udal kirol-instalazioari era iraunkorrean loturiko ondasunak.

Udal kirol-instalazioen ezaugarriak aipatutako helburu eta xedeekin bat dator.

Hasiera batez araudi hau aplikatzekoa izango duten kirol-instalazioak honako hauek dira:

- Orozkoko Udal kiroldegia.
- Orozkoko Udal Frontoia.
- Udal ondarearen barruan sar litekeen beste edozein kirol-instalazio.

3. artikulua.—Instalazioak irekitzea eta jendearekiko arreta

Irekita egongo dira udal kirol-instalazioak jendearentzat, eta edozein herritar sartu eta instalazioak erabili ahal izango ditu, indarrean den araudiaren arabera, dagokion udal tasa ordainduta.

Alkate-udalburua arduratuko da herritar, klub, federazio eta beste erabiltzaileen artean jokaleku eta instalazioak erabiltzeko ordutegiak emateaz; jendeari erantzuteko bulegoa Orozkoko udal kiroldegiko instalazioetan ezarrita gelditzen da.

4. artikulua.—Kirola egitea

Udal Kirol-instalazioak eskola-kirol hezitzaileerako erabili ahal izango dira, aisialdirako, txapelketarako eta egun jakin batzuetan izaera sozialeko jardueretarako, baldin eta kasu bakoitzerako jasotzen diren baldintzak betetzen badituzte.

Instalazio bakoitzean berariaz xede dituzten kiroletarako erabili ahal izango da. Beste kirol batzuk ere egin ahal izango dira, baldin eta teknikoki posiblea bada eta aurrez udal baimena eskuratu bada. Baimena alkate-udalburuak emango du, diskrezio-ahalaz.

5. artikulua.—Araudiaren garapena

Berariaz alkate-udalburua ahalmentzen da araudi honetan xedaturikoa garatzeko dagozkion ebazpen guztiak eman ditzan, erabiltzaileei zerbitzu hobea eskaintzeko eta instalazioak hobeto erabiltzeko, betiere ebazpenak araudi honetan xedatutakoaren kontrakoak ez badira.